

## CHURER SCHNUDERGOOFA 2018

Bis vor kurzem simmer öppa heimlich in dr Nacht  
illegal go spraya gsii, Graffitis hämmer gmacht!  
Jetzt müamer drastisch reduziara, hörend nögschtens ganz,  
will d'Edith hät sit kurzem a Lackdosa-Intoleranz!

Denila, Maxil, Sirius, Sandor und Maxima  
Ambra, Aris, Ariel, Coral und Linea  
Wäschmittelwerbig isch das keini, sondern ohni Spass  
di aktueli Schülerlishta vu dr zweita Klass.

Wäg youtube, facebook, netflix, instagram und twitter  
stoht's um üsri Bildig, **gopfertammi** schitter!  
Steck**dosa** und **elektrisch** Stora **sind** hüt wohlverstanda  
**schu** intelligenter als **üsri** Maturanda.

Dr Wätterbricht für morn isch geil, as khämm brachial go winda  
aso khönnt d'gröscht Problem vu üsra WG glatt verschwinda.  
füf Churersäck platzierend miar am Balkon ganz famos  
Miar händ schu Panik kha, miar werdend dä Dreck nia meh los.

Am WEF hät Johann Schneider-Amann **mit** am Donald gretd  
und **dä** wünscht sich nach zwei drei Sätz: I wett as Happy-Bett.  
Dr Trump hät hüt dahei am TV live **mit**verfolgt ir Nacht  
wia dr Schneider-Amann sina letscht Satz fertig macht.

A ganz flotts Bürschtli isch dr Cavigelli frühner gsi  
bir Sonderjagdinitiative leit er alli dri.  
Doch ds Bundesricht schiff ihm ans Bei und fordret ohni Hohn  
für dia Vorlag kei Hirsch- aber a Reanimation.  
Dia Sonderjagd isch sona Fall und d'Fachlüt schritend sich  
mit üsrem Vorschlag schafftsch dia ab und d'Jäger freuen sich!  
Vum erscha bis zum zum zehnta im Monat, sind dann pro Jäger drei  
illegali Pilzler zuasätzlich zum Abschuss frei.

*Noch nicht fertig:*

Ds iphone 12 wird huara gross, miar Goofa findens geil,  
au wenn iar 's gar nit glauba wend, a Türa heg das Teil  
as seg begehbar und as gsächi wians Hüüsli us  
woma dinna flott telefoniara khann, khunsch druus?

2016 oder 2017 nicht gesungen:

Hundert Elektrokerzli hämmer sanft entfacht  
und im Advent mit tuusig Volt a huara Stimmig gmacht.  
Vor Heilig Oobet löschend miar dia Liachtshow zimli gschwind,  
nochdem drei Passagiarflugzüg im Garta glandet sind.

Mit jedem Kärtli, wo du schtecksch, gönd Data in a Bank  
Dr Coop und d'Migros wüssend alls vu miar, das macht mi krank!  
Als Konsument häscht zwor a Vorteil, wenn d' so gläsern bisch,  
will d'Darmschpiaglig bim Dokter wesentlich aagnehmer isch!

Mis Händy lahmt, isch duurend läär, hängt schtändig an dr Doosa,  
s'isch eis, wo uf d'Bezeichnung „Feschnetztelefon“ würd loosa!  
Und im Dezember au bi miar, dä Fall, wo jeda kennt,  
dr Akku explodiert! Advent, Advent, miis Handy brennt.

Im Swisscomshop wirsch brandversehrt als erschts fotigrafiert,  
noch zwei Schtund kriagsch vum blonda Chick a Käffali serviart.  
Dänn witer warte, tagelang und dänn halt konschterniert  
drei Wucha lang dr Schtandschaada in Hüft und Knü kuriart.

Im Rägawurm, do kriagend miar, für füüf Schtutz, jetz muasch loosa,  
Zwei Kilo Käs, drei grossi Brot, a Speck, a sona groosa!  
Sit letscher Wucha ischs vorbei, miar sind total fruschtriart:  
Jetzt händs au do an Überwachigskamera montiert.

Jetzt kaufend miar halt online ii, per App wird konsumiert,  
s'git eis, wo eim dr Herzschrittmacher flott synchronisiert.  
Ds Einzig, wo bis jetz no nit in mini Bira goht:  
Warum, dass, wenn i mii uufrega, ds Garagetor off goht.

### ***Aus vergangenen Jahren (z.T. abgeändert):***

Ds **Rücktritt**sgsuach vum Bischof Huonder khunnt in Rom schlecht aa  
dr Papscht meint schelmisch: iar khönn dä ruhig no a Jöhrli haa.  
Bis Ostera zweituusig-nünzehn blibt er jetz, wie gseit,  
Franziskus hät us wieder amol as Ostereili gleit.

Dabii brucht d'Kircha jetz Events, a Ravermess wär geil,  
am Bahnhof gäbtis a Mac-Biicht für ds schnella Seelaheil.  
Am Schluss vur Mess schreit jeda Pfaff mit Innbrunsch ins Gebäu:  
„Die zehn Gebote präsentierte euch Calanda Bräu“.

Am Klimagipfel z'Bonn händs wieder drei Wucha nu gfrässa,  
dass umwelttechnisch öppis goht, khasch ei mol meh vergässa.  
Dr Trump meint gar, weg Hurrikans , mach er sich nid in d'Hosa,  
nach 12 Johr Ehe isch dä froh, wenns öppa khunnt go bloosa!

Dr gliichi Trump hät üs as Johr mit sinra Fritta quäält,  
wia wirsch mit soma Zaus am Hirn zum US-Präsi gewählt?  
Ir Schwiz hät ds Parlament vor Johra verhind'ret dia Tortur  
und mit am Alain Berset eina gwählt ohne Frisur!

Zugabe:

Will Kinder Fett am Ranza händ, wird d'Schual jetz halt bewegt,  
im Zimmer, uf am Pausaplatz wird gschpörtlet ganz verreggt.  
Mit Liegeschütz und Dauerläuf wird jeda Goof verwöhnt,  
nu d'Minischtranta händ Dischpenz, dia sind ds Abseggla gwöhnt.

Dass ds Klima nit no wärmer wird, muss endlich öppis goh,  
doch kei Politiker isch bis hüt uf a Lösig kho.  
Vielleicht wär ds eifachscht Mittel glich ds Donald Trump-Syndrom:  
Er isch kei grossi Lüchta und damit schpart er Schtrom.